



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Gaza nung pua alir chioktsü mechi PM Netanyahu-i sen \$5m agütsütsü

BJP masü saka Biren-i aniba sorkar den pila: Conrad Sangma

VOL. XXII ISSUE NO. 43 (ADOK 43) DIMAPUR

YANGTEPNÜ (THURSDAY)

YIMPOKSÜI (NOVEMBER) 21, 20 ₹ 5.00

Peru-i Hornbill Festival nung partner asütsü

Dimapur, November 20, 2024 (Agencies): 25 buba Hornbill Festival nung Wales aser Japan den külemi Peru-ia partner country ama shilem agütsü.

Chief Minister Neiphiu Rio-i anir deputy chief minister ana den cabinet züngsemtemi Bodbarnü New Delhi nung Peruvian Ambassador Javier Manuel Paulinich Velarde den ajurutepe.

"Hornbill Festival 2024 atema Peru-i Country Partner ama

shilem agütsü tepela osang lemsateper. Ambassador Javier Manuel Paulinich Velarde den ajurutepego. Peruvian artistes aser cultural performers-i shilem balala agütsü. Iba ajanga tesentaktep akangshitsü" ta CM Rio-i metetdaksü.

Ambassador-i mapa inyakba ajanga tesentaktep asangsang nung yanglutetogo aser Nagaland-i Peru nung agizüksü yongya atar ta DIPR sangdong ka nung ashi.

Manipur nung mobile internet shibangba atsülanger

Guwahati, November 20, 2024 (Agencies): Manipur sorkari Bodbarnü district 7 nung mobile internet services shibangba anogo asemnü atsülangtsü metetdaksüogo.

Imphal West, Imphal East, Kakching, Bishnupur, Thoubal, Churachandpur aser Kangpokpi nung mobile internet services maneni shibangtsü.

"State sorkari law & order tensa meyipa repringshiba sülen district tenet nung mobile internet services shibangtsü lemtet" ta sorkar sangdong ka nung ashi.

Tensa mejungi akümba agi November 16 nü sorkari anogo ananü atema mobile internet services shibangtsü tetuyuba agüja liasü.

Iba sülen November 18 nü ano anogo ananü atema atsülang. November 16 nü Manipur sorkari mobile internet services aser

broadband shibang saka November 19 nü broadband services shibangba agienogo.

Imphal West, Imphal East, Bishnupur, Kakching aser Thoubal district tem nung Brihostibar anepdang 5:00 ako nungi anüngdang 12:00 ako tashi curfew salatsü ta ketdangsurtemi metetdaksüogo.

Nüboritemi nüngdabatem lijaliyongtsü atema curfew salatsür, ta ketdangsurtemi ashi.

Kasa district tem nung Bodbarnep 5:00 ako nungi anepdang 10:00 ako nung curfew salatsü

November 11 nü Jiribam district nung telungpur 10 kasetba aser tetsür asem den tanur asem pur aoba tasümantem anguba sülen tensa mejungi akümba ajanga November 16 nikongdang 4.15 ako nungi valley districts nung curfew benok.

Maharashtra & Jharkhand nung exit polls teimbai NDA nem takok agütsür

New Delhi, November 20, 2024 (Agencies): Jharkhand nung Bharatiya Janata Party-i aniba teloktep ajanga JMM-Congress teloktep madak takok angütsü aser Maharashtra nung Maha Vikas Aghadi teloktepi takok angütsü ta Bodbarnü exit polls aikati asadantetba osangtem metetdaksüogo.

Ajisüaka, exit polls karibo JMM-i aniba teloktep aser MVA ajanga takok angütsü ta ashir.

Jharkhand nung Axis My India-i dang Congress-JMM ajanga takok tulu angütsü ta ashir. Iba exit poll ajanga JMM-i menden 53 aser BJP-i aniba NDA ajanga menden 25 dang angütsü ta ashir.

Electoral Edge exit poll-ia JMM-i aniba teloktepi menden 42 aser NDA-i menden 32 nung takok angütsü ta ashir. Jharkhand nungsa Matrice Exit poll-i NDA ajanga menden 42-47 aser INDIA bloc ajanga menden 25-30 angütsü ta asadantetba shiogo.

People's Pulse-ia NDA ajanga menden 44-53 aser INDIA Bloc ajanga menden 25-37 angütsü ta

ashir. P-Marq-ibo JMM-i aniba teloktep ajanga menden 37-47 aser BJP-i aniba teloktep ajanga menden 31-40 angütsü ta asadantetba.

Maharashtra nung Matrice exit poll-i BJP-i aniba Mahayuti teloktepi menden 150-170 aser Congress-i aniba teloktepi menden 110-130 angütsü ta asadantetba metetdaksüogo.

People's Pulse-i agiba exit poll ajanga NDA's Mahayuti nem menden 175-195 aser MVA nem menden 85-112 agütsür. P-MARQ exit poll-i NDA nem menden 137-157 aser INDIA bloc MVA nem menden 126-146 agütsür. Electoral Edge-i MVA ajanga menden 150 aser BJP ajanga menden 121 angütsü ta ashir.

Lokshahi Rudra-ibo Mahayuti aser MVA tsüngda anasatepa takok angütsü ta ashir. Parnoki Mahayuti nem menden 128-142 aser MVA nem menden 125-140 agütsür.

Jharkhand aser Maharashtra assembly elections indang results ya November 23 nü azüngtsü.

Health & Family Welfare Minister, P. Paiwang Konyak-i Mkg semdang Mozüki tasenba block 'A' atema Cr. 3 aser CCU atema Cr. 2 agütsütsü

Mokokchung, 20 Nov (TYO): Nagaland Health and Family Welfare Minister, P. Paiwang Konyak-i Dr. Imkongliba Memorial District Hospital (IMDH) Mokokchung den Sabangya (Chungtia) nung tang tesüdak Ayush Hospital aser Mokokchung nung anogh aser mozü ayokdak (pharmacy) tesem kar semdanga liasü.

Tesem balala sema jajar külen IMDH conference hall nung mensem ka akadang, Minister Paiwang-i jembidang, IMDH nung inyaker doctor, nurse aser staff-tem pei tata mapa shitak inyaker-meinyaker, tang teinyakdak sorkar kisüjensü mapatongtem koda aor, nübur anema aliba tsütsü shih-angoh shitak ayoker-mayoker, mozü ayokdak ozüngi memelaba mozümora ayoker-mayoker mesüra pharmacy nung

amentsüpur shitakba amener asü-masü, mesüra dokan nung foreign chiyungtsü temelaba makai ayokba, itemji meita repringtsü atema yangi aruba lir, ta metetdaksü.

Angoh ayokdak tesem kar semdangogo aser item anogh nungji miim aketba mozümora ali-mali tetendangba agütsü aser mozümora inoker yoka lira tapet mera agia merenshitsu mesüra item chiyungtsütemji shibangtsütsü, ta ashi.

Pai Sabangya nung tang tesüdak Ayush Hospital semdanga liasü, yangji gari lenmang aser tajemtsü tzü aser electric light tebilemstü atema khuret süa lemsatep. Tang koba IMDH mozüki tuluba küma yangludat, Block 'A' tekaratiba nung renemtsü asoshi sen crore 3 (three) agütsütsü, ta metetdaksüogo.

Iba den külemi paisa IMDH

nung tang tesüdak Critical Care Unit (CCU) tekaratiba nung renemtsü asoshi crore 2 agütsütsü, ta shiogo. Ano nurse hotel nung koba tzü agi timtemer ibajia tekaratiba nung repringtsütsü, ta paisa ashi.

Nagaland nung doctor kanga ajema lir, doctor noklang dak tema nüngdaker. Covid-19 mapang doctor shirnok shima liasü, parnoki alima koda masüba lendong tulu mapang bendanga tenzükogo, anungji, parnok atema 'special recruitment' ka agütsü sorkar sentong liasü. Saka doctor kari okadak abenba ajanga ibaji khen thitema lir. Iba ajanga asenok tang timtemer saka kopi malii okadak kenoji temdir special recruitment ji agütsü, ta Minister-isa shiogo. "Koda masüba mapang parnoki taküm bendanga agütsüogo, anungji, nüburtemi aji mamatoktsüla", ta paisa shisem.

(Maneni tapak 2 nung...)

Iba den külemi paisa IMDH

(Maneni tapak 2 nung...)

Rongsenketzüng nung rangloker ENPO tebilemba agizük: Jacob Zhimomi



November 20, 2024 nü Central Nagaland Tribes Council (CNTC)-i Senden Riju, Dimapur nung cultural exchange program ayonga agidang PHED and Cooperation Minister Jacob Zhimomi-i o jembiba angur.

Dimapur, November 20, 2024

(TYO): Nagaland sorkari yimtenren atema masü saka rongsenketzüng atema ENPO-i FNTA Autonomous Council meshiba mulunga agizükogo ta PHED & Cooperation Minister Jacob Zhimomi-i ashi.

Bodbarnü Central Nagaland Tribes Council (CNTC)-i Senden Riju, Purana bazaar nung sobaliba lemsatepba sentong nung Jacob-i iba osang lemsatep.

State sorkari küm 10 shia meyipa repringshitsu tangatetba nung ENPO tebilemba mulunga agizük ta pai ashi.

"Iba tebilemba ajanga Naga nung ajangzüksü süra aser ENPO kübok district 6 nung terenlok aginüba ama ngura state sorkar pusema nungütsü. State kübok kinük ajaklen terenlok alitsü atema asenoki pusema

nungütsüla" ta Jacob-isa ashi.

"Naga nung rongsenketzüng nung Lotha aser Sumi dang 'advanced tribes' ta ajar ajisüaka asenoki alemli nungi tanüngba Naga nung den tesentaktep lia aruba mepilatsüla" ta paisa ayongzük.

"Kin asem yagi Nagaland renlokba nung tongtipang shilem agir. Nagaland ya kin 17 meyong lir anungji asenoki tanüngba kintem den tesentaktep akangshitsüla" ta Jacob-isa ashi.

"Tanü Nagaland nung tangatetba melii aser pei ajungtsü asaa telok aika tenteta lir. Anungji züngsemtemi tongti teloktem dang asüngdangyatsü aser temelaba meshitsu atema CNTC-i bangzüng ka renema ayutsüla" ta pai ashi.

"Nagaland state renlokba aser azükaruba nung kin shia aser district shiai tongtipang shilem agütsü" ta paisa shisem.

"Mapang talangka mekokteti aruba Naga yimten tebilemstü angatetteptsü atema asenoki shilem tuluba agütsüla. Kin ajak ajangzüksüla aser iba nung central tribes-i tongti shilem agütsüla" ta paisa ashi.

"Kin asem sabang ka nung adenshiba atema tenüngsang agütsür. Iba ajanga putepa aliba aser külemi tejakleni aoba sayur" ta Road & Bridges Minister G Kaito Aye-ia ashi.

Ibala sentong ajanga külemi aliba aser kati ka angatetteptsü jangjashitsür aser ibala sentong ajanga Naga kintem tsüngda tesentaktep akangshir, ta Kaito-isa ashi.

Iba sentong nung Water Resources Advisor Tongpang Ozukum aser Ao Senden, Lotha Hoho aser Sumi Hoho nungi teshimtet nübotemi o jembiba.



Minister, PHED & Cooperation, Jacob Zhimomi meina Deputy Commissioner, Dimapur, Tinojongshi Chang aser danga ketdangsür temi Bodhbarnü Dimapur nung aliba Old Overbridge tang teyangludak aliba semdangba noksa nung angur. Iba mapa ya October ita tenzük aser takumbo metemtetsü amai lir.

Dimapur yimti nung lenmang samatar: DCC

Dimapur, Yimpoksüi/Nov. 20 (TYO): Nagaland nung shishilebadak tiyongtsü, Dimapur nung lenmangtem kanga mejungi kumogo aser tim ketdangsüri anepalu masü, ta tanü District Congress Committee (DCC) ajanga ashi. Congress Bhavan, Dimapur nung osangbener den jembidang, aoyi aser potholes agi sünger aliba lenmang nungya nüburtem asoshi timtem jenti lir,

ta DCC tir Kuhuto Chishi-i ashi. Overbridge ka yanglushitsü asoshi shibangadoker asünung, lenmang tamajung nung gari senzütsü tarendaktsü kumogo. Tesüsa ULB elections agidangbo candidates temi parnok indang manifestoes nung tenanzükba tulu bener aru, saka elections nung takok anguba sülen candidates aikati pei aliba tesem yanglushitsü mebilerem, ta Congress-i aitsü.

Elected members temi inyakyim reprangtsü mapang tongja tongogo, ta pai ashi. DCC ajanga sorkar dang Dimapur nung lenmang mejungi kumer aliba indang reprangtsü aser election manifestos nung shia aliba ama temelenshi bener arutsü ayongzük. Congress-isa department balala dang central schemes/projects tem nübur tongtsütsü ayongzuka liasü.

Health & Family Welfare Minister...

(TAPAK 1 NUNGI...)



Nagaland Health and Family Welfare Minister, P. Paiwang Konyak-i Dr. Imkongliba Memorial District Hospital (IMDH) Mokokchung semdangba noksa nung angur.

Department nung tang doctor-tem mapa tazüing kar lir, iba dak sentakba nung tatidang tapu ana küma lemsar agitsü sentong lir, ibaji 'specialist' aser 'non-specialist'. Iba asayameyangji sarkari agizükra, mapa tazüing atemaji tatidang yakta agitsü, ta paisa ashi. MBBS renemertemji state sarkari agitsü ta MBBS kaketshirtem den sarkari tezülutepba yanglua lir, anungji, M.O agibo manüngtsü saka specialist atema tebilemtsü lir aser tang nungdakbaji

'specialist doctor' lir, ta paisa shisem. Ita ishika tsüngta Nagaland nung specialist doctor aika mapa nungi sodi angutsü lir, aji oda, mozüki aika nung specialist malitsü, ta paisa khuret kar lemsatep. Iba senden nung Ao Senden lenirtemi Minister Paiwang dang tang tesüdak IMDH ki tasenba ya tekaratiba nung talangka amshitetsüsa kanga junga yangludaktsünür aser IMDH nungi taoba ita ishika jakdang doctor pezü transfer aoba atema

tekaraba nung temelen yokdaktsünür, ta mepishia metetdaksü. Minister Paiwang Konyak den par department nungi sarkar tongtipurtem aika anitaka jajadaki. Par telokisa CMO aser IMDH staff-tem den jurila senden ka mena sarkar sentong dak sentakba nung shisa lemsatepa liasü. Nov 21 anepdang Ministerbar telok ya Tuensangi aitsü aser iba sülen ano tanga district kar sema jajatsü sentong lir.



Synergy Group Enterprise ajanga Department of Tourism den lungjemer Urban Haat, Dimapur nung Naga Chef Season 11 tenzükogo. Mezüngbo nisung 10 toktepa liasü saka tang "Naga Chef" nungja angutsü nisung 7 anünga lir. Iba tetoktepa nung Top 4 jenjang tongteter temi Naga Heritage Village, Kisama nung December 1-10, 2024 anogotem Hornbill Festival alidang parnok sempet sayutsü maongka angutsü.

Nagaland Angh aser NPF ajanga Wangala benjong salem lemsatep

Dimapur, Yimpoksüi/Nov. 20 (TYO): Garo nunger dangi Wangala benjong salem abener, ta Nagaland Angh La Ganesan-i sangdong ka nung ashi.

Misi Saljong, Sun God temoatsü ajanga yimchiyimjung, anema aliba temoatsü den alu t s ü k s ü n g - e n s ü n g a rudakjangma.

Asenoki asem tema, tsüingsanga aser tenüingsang agüja iba benjong amundang asen kin tsüngta tesendaktep tali tashi taitba nung aintsü aser asen sobaliba maneni ulushia akumtsü moatsür, ta Nagaland Angh ajanga ashi.

Iba Wangala benjong ajanga ner temulungjang aser kidang tepela agi süngdakjang aser aluruba mapang temoatsü talubosa lidakjangma, ta Angh La Ganesan-i ashi.

Wangala benjongmung nung

NPF ajanga Nagaland aser tesem balala nung aliba Garo nunger dangi salem abener, ta Naga People's Front (NPF) sangdong ka ajanga ashi.

Wangala benjongmung ya aki-alu nung temoatsü aliba asoshi anü tsüngrem Misi Saljong nem tenüingsang agütsüba, telungjem, sobaliba aser yimsü-yimpong temaitsü lir. Iba mapang külemkeja, ken aser asem aika lirumedema tema Garo nungeri sobaliba tajung nem akhum agütsür.

Iba benjongmung nung shilem agitsü nenok adianu aser tembartem adenshidang, benjong tepela, yimchiyimchung aser temoatsü kibong ajak dak liangma. Wangala tanüla ahi kin ajunga den tesendaktep alitsü imla atar, ta NPF sangdong ajangasa ashi.

Mokokchung nung Nov. 22 nü lokti nübuttsük ayonger

Dimapur, Yimpoksüi/Nov. 20 (TYO): Benjong mapang arur asünung, November 22, 2024 anepdang 6:00 ako nungi tenzuka sorkar mapa inyaker ajak, ULBs, NGOs aser nüburtemi shilem agia lokti nübuttsük alitsü, ta Deputy Commissioner, Mokokchung,

Thsuvise Phoji-i sangdong ka nung metetdaksü. Anungji Mokokchung District kübok administrative Sub-Division/Circles/departments/Offices/institutions anunga nungi iba lokti nübuttsük nung shilem agitsü metetdaksür, ta sangdong ajanga ashi.

Nov. 23 nü Hornbill Festival asoshi terenemshiba asadangtsü

Dimapur, Yimpoksüi/Nov. 20 (TYO): 25 buba Hornbill Festival, 2024 asoshi terenemshiba asadangtsü atema senden ka Nagaland Chief Minister lenisüba kübok November 23, 2024 anepdang 10:00 ako nungi tenzuka Rhododendron Hall,

Police Complex, Chümoukedima nung amentsü, ta Department of Tourism ajanga sangdong ka nung metetdaksü. Iba senden nung sendaka aliba ketdangsür ajunga adentsü ayongzük, ta sangdong ajanga ashi.

FM Radio channel tem auction asütsü

Dimapur, Yimpoksüi/Nov. 20 (TYO): Yimti 234 nung FM Radio channels 730 auction asütsü atema Union Cabinet-i melaogo, ta Ministry of Information & Broadcasting ajanga sangdong ka nung metetdaksü.

Iba maparen ya ajanga taoba mapang private FM radio stations temi awajemba yimitem nung radio angar asoshi tajangshiba tasen bener arutsütsü.

2001 küm private FM radio lapokba sülen yimti 113 nung channels 388 agüja media tsütsü teyari tulu agütsü. Tang tasen

ulushiba yagi radio sector nung mapa tasen adokdaktsütsü aser linük tesem ajungalen radio ajanga 'entertainment' bener arutsütsü, ta ashi.

Dimapur, Kohima aser Mokokchung nung channel asem-sem densema yimti 234 nung channels 730 auction asütsü atema e-bidders asoshi application meshia Ministry of Information & Broadcasting nungi sangdong agütsüogo.

Iba sangdong ya Ministry indang website https://moinsta.na.gov.in/NA_40024.html nung angutsü.

DC Kohima-i petrol pumps nung restroom aser tajemtsü tzü agütsütsü tuyu

Dimapur, Yimpoksüi/Nov. 20 (TYO): Deputy Commissioner, Kohima, Kumar Ramnikant, IAS ajanga sangdong ka nung petrol pumps aser talisa National Highways aser Kohima district telungzük nung aliba petrol pumps tem nung restrooms aser tajemtsü tzü agütsütsü metetdaksü.

District nung aliba petrol pumps kar nung restrooms aser

metzü meshiba tesem junga anepalu masüba mesüra majungba indang osangtem aruba sülen iba totuyuba ya agütsür.

Petrol pumps nung kechi südir süaka tajemtsü tzü aser restroom facilities agütsütsüla, aser aibelener nem tapet ozüing agi merenshitsü, ta Deputy Commissioner, Kohima ajangasa metetdaksü.



November 20, 2024 nü Georgetown, Guyana nung India nungertemi Ato kilonser, Narendra Modi agizükdang tangokba noksa nung angur.

Delhi nung Odd-Even Scheme benoktsüa akok

New Delhi, November 20 (Agencies): Tesüiba anogo aika Delhi nung mopung kanga menena air quality index (AQI) 'severe' category nung lir, ibayongji mopung menenba azüoktsü atema ketdangsertemi tenokdangba balala benoker. Delhi nung mopung kanga menenba azüoktsü atema telemtetba balala agia inyangang, ta Supreme Court-i tuyuba nung ajemdaker Delhi nung AAP sorkari GRAP stage IV kübok tenokdangbatem benokba sülen maneni tenokdangba kar benoktsü tebilemba lir. Delhi Environment Minister, Gopal Rai-i, mopung menenba maneni nokdangtsü atema sorkari odd-even vehicle scheme benoktsü tebilemba lir, ta metetdaksüogo. Central Pollution Control

Board-i, Bodhbarnüa Delhi tesem ajaklen AQI index "severe" category nung liasü; anepdang 6:00 ako tashi nung RK Puram nung AQI level 423 liasü aser Anand Vihar nung level 453 liasü, ta metetdaksü. Ajisüaka independent agency IQAir-ibo, New Delhi nung AQI level ji 573 nung "hazardous" category nung lir, ta metetdaksü. Tesüiba hopta ka den medemdangra Delhi tesem aika nung mopung menenba terabo süngjemogo, aser ibaji talisa gari senzüsempogba dak sendakba nung tenokdangba balala benokba aser kiojen asüba nokdangba agi lir. Delhi nung AQI level kanga majungba agi schools, colleges aser universities aika nung online ajanga dang class agi

tenzükogo. Bodhbarnü Delhi Environment Minister Gopal Rai-i, Aam Aadmi Party sorkari Delhi aser NCR region nung mopung menenba tensa mita reprangdar, ta metetdaksü. Osangbenertem den jembidang Rai-i, NCT sorkari mongintem den asüngdangtepa jembiba sülen Odd-Even scheme benoktsü, ta metetdaksü. Odd-Even scheme kübok 0, 2, 4, 6, 8 agi tembangba gari number plates keta alirtem even number anogotem nung dang senzüsü melatsü aser odd numbers 1, 3, 5, 7, 9 agi tembangba gari number plates alirtem odd number anogotem nung dang senzüsü melatsü. Iba scheme kübok Electric garitem aser CNG garitembo maittsü.

Maharashtra election Exit poll: Mahayuti-i takok angutsü

New Delhi, November 20 (Agencies): Bodhbarnü Maharashtra nung assembly election agiba sülen nikonkdang exit polls balala ajanga BJP, Ajit Pawar-i aniba NCP aser Eknath Shinde-i aniba Shiv Sena densema aliba Mahayuti teloktepi takok angutsü, ta asadangtetogo. Matrize, Peoples Pulse aser Chanakya exit polls ajanga Maharashtra nung Chief Minister Eknath Shinde-i aniba Mahayuti teloktepi takok angutsü asadangtet. Maharashtra nung assembly menden 288 lir. Matrize exit poll ajanga, Mahayuti teloktepi menden 150 nungi 170 tashi nung takok angutsü, Congress-i aniba Maha Vikas Aghadi (MVA) teloktepi menden 110 nungi 130 tashi angutsü aser party tilatem den independent candidates-i menden 8 nungi menden 10 tashi nung takok angutsü, ta asadangtet. Peoples Pulse exit polls ajanga Mahayuti teloktepi menden 175-195 angutsü aser Maha Vikas Aghadi teloktepi menden 85-112 angutsü ta asadangtet.

Chanakya exit poll ajanga Mahayuti teloktepi menden 150-160 angutsü aser Maha Vikas Aghadi-i menden 130-138 angutsü, ta asadangtet. Ajisüaka P-Marq exit polls ajangabo Mahayuti aser Maha Vikas Aghadi nati menden atongtepa angutsü ta asadangtet. Mahayuti-i menden 137 nungi 157 tashi aser MVA teloktepi menden 126 nungi 146 tashi nung takok angutsü, ta parnoki metetdaksü. Item tasadangba ya exit poll survey agiba dang lir, anungji November 23 anogo nung ang vote zünga shirnoki takok anguar metettsü. 2019 küm Maharashtra assembly election nung BJP-i menden 105 nung takok ngua liasü, Shiv Sena melemsai aliba mapang nung parnoki menden 56 nung takok angua, Nationalist Congress Party (NCP) melemsai aliba mapang nung parnoki menden 54 angua aser Congress-i menden 44 nung takok ngua liasü. Uddhav Thackeray-i aniba teloktep sorkar chirepba sülen Eknath Shinde-i aniba Shiv Sena teloki BJP den lokteper sorkar tenteta liasü.



November 20, 2024 nü Mumbai nung Shiv Sena (UBT) tongti, Uddhav Thackeray den pa kinüngtsü Rashmi Thackeray aser jabaso ana- Aaditya Thackeray aser Tejas Thackeray nungeri vote agütsüba temaittsü sayudang tangokba noksa nung angur.

Rajnath Singh-i China Defence Minister Dong ajuru

New Delhi, November 20 (Agencies): Vientiane, Laos nung 11buba ASEAN Defence Ministers' Meeting-Plus senden aliba mapang nung Defence Minister, Rajnath Singh-i China Defence Minister Dong Jun den jurila senden ka menogo. India aser China sepaitemi anüdoklen Ladakh kübok points ana nungi aienshiba sülen tang mezüng linük ana nungi Defence Minister ana ajuruteper. Iba senden nung jembidang Rajnath Singh-i, India aser China na tsüngda tesendaktep

ajungba ajanga alima nung yimjung aser azükaru jenjang tajungba akümtsü, ta ashi. Paisa, India aser China na ya maneni kiyongersa asütsü, anungji raratsü agibo amalitepa inyaksü atema dang rangloker inyaksüla, ta ashi. Paisa, 2020 küm arrtsülen raraba nungi tansütsüla aser tarutsü nungbo nokdangtsüla, kechiyong item ama tatalokba ajanga linük ana arrtsülen yimjung raksatsür, ta ashi. Paisa, linük ana tsüngda maneni tensa tajungba akümtsü atema kati ka dak temelung

lemtepa alitsüsa inyaksüla, ta ashi. Rajnath Singh-i anogo asemnü Vientiane semdang. November 21 nü pa 11buba ADMM-Plus senden nung adentsü aser iba senden nung pai regional aser international security tebilemtsü onüktem atema jembitsü. ADMM-Plus nung ASEAN (Association of Southeast Asian Nations) linük 10 lir aser dialogue partners 8 - India, China, Australia, Japan, New Zealand, Republic of Korea, Russia aser United States lir.

Küm 56 sülen tang mezüng India Ato kilonser kati Guyana semdang

New Delhi, Yimpoktsü/ November 20 (Agencies): Bodhbarnü India Ato kilonser, Narendra Modi Guyana linük tonga ogo; küm 56 sülen tang mezüng India nung Ato kilonser kati South America nung aliba linük ya semdang. Pa Georgetown nung aliba airport tonga aoba mapang nung Guyana Tir, Mohamed Irfaan Ali den cabinet minister aikati pa agizüka liasü. Airport atongba sülen Modi aser Mohamed na azütepa liasü. Georgetown nung Modi-i Guyana Parliament nung jembitsü aser 2buba India-CARICOM senden nung pai Caribbean linüktem nungi lenirtem den o lemteptsü. Guyana semdangba mapang nung India aser Guyana na tsüngda tesendaktep tajungba akümtsü atema jembitsü. 2003 küm January ita nung Pravasi Bharatiya Divas anogomong nung Guyana Tir, Irfaan Ali tongti tesemdang

jaoka liasü. India aser Guyana na tsüngda health, connectivity, renewable energy aser defense densema sector aika nung amalitepa inyaker. Tawa India-i Guyana nem Garden Reach Shipbuilders & Engineers-i yangluba rong ka agütsü, HAL 228 aircraft ana agütsü, kibong 30,000 nem solar lights agütsü aser India nung ITEC kübok Guyana nung 800 nem training agüja liasü. Alima nung rongsenkettstung kanga kera ainba linüktem rongnung Guyana densema lir. Hydrocarbons, healthcare, education aser defense sectors nung iba linük den amalitepa inyaksü asoshi maongka jenti lir, ta External Affairs Ministry-i metetdaksü. Ato kilonser Modi leniba nung ketdangsertemi Tir, Irfaan Ali den linük ana tsüngda amalitepa inyakba jenjang ano tajungba akümtsü atema jembitsü.



November 20, 2024 nü Jharkhand assembly election tatembangbuba anogo nung Bokaro district nung aliba polling station ka nung vote agütsüsupurtem tarensena nokdaka aliba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, NOVEMBER (YIMPOKSÜI) 21, 2024

Kisütsü dang jangrar !

Anogo ishika jakdang WhtasApp nung prokshiba video ka nung Nagaland Skill Development & Entrepreneurship department-i Longleng nung Industrial Training Institute (ITI) ka lapoktsü atema kiojen ajak renemer 2023 küm January nung semzük saka tang tashi iba ITI ji metenzükteti ITI agi arem kümdaktsüba angudang tezüdanga reprangogo. Ajisüaka, aji dang masü saka Dimapur len nungi atudang Kohima among nung Farmers' market ta ser ki ka taoba küm telapokbo Union minister nem lapokdaksü saka tang tashi shibanga dang angudang süngmanga bilemogo. Itemji mesüka asen lima nunga lenjem – lenjem nung aluyimertem asoshi shishidak kibo tajung yangluba lir saka teshishir mali azüngazünga dang angur. Iba amaji Nagaland tesem aika nung department balala indang kibo yanglu saka iba kiji amshitsüsa mapa metenzüktet raksadajka alitsü südi. Kasaji, asenok yimtake aser town nunga 'Panchayat Hall' mesüra 'Community Hall' yanglutsü dang jangrateper aser ibaji benjong amai sentong yanglua semzükteper. Itemji dang masü saka asenok arogotem nunga Tsüngtem temeim kuli süa sarasadema jajatsüba dang nungibo kisüjensüba mapatem inyaktüang tejangraba aser tongtibangba akümer. Ibayongji, tamangertem tamang nung takangba kuma tangar samaa aliba tanelatem anir arutsü melena arogo nung kisü manener aser tenla aruba sen teimbaka kisüba nung endoker. Aji oda, government nunga sen apua office ki yanglur saka yangji mener inyakba agi asen lima tajungba kuma yanglutsüsa kecha inyakteta mangur. Ibayongji, Kohima nung Civil aser Assembly Secretariat aser Directorate ajak pei pei office kitembo tangar bendang lima nung aliba kitem adoksa kanga jungasa yanglua lir saka item Secretariat aser Directorate nung mena yur endokba sentsü küm shia teimba-teimba akümer. Aji oda, Nagaland nung state government, lokti aser arogo ajak ya " Nagaland Building Construction Company " amai ka dang kumogo. Tangarbo ki yangluba ya yangji lia mapa inyaktü yanglur saka asenokbo ki yangluba ya ki yangluba nungi tajanzük angutsü imlaa yanglur. Iba amaji ka masü nungbo Training agitsü ki yanglur yangji training metenzüktet arem mekümdaktsütsü mesüra ki topur junga yanglur yangji mapa inyaktertem mapa inyaki marubo masütsü. Kasaji, kisüba mapa nung tenüng aser tajanzük agia inyaktü mejangra nungbo sen aika endoka tenla ki tajung yanglua yur sentepi arur mali masütsü. Item ya kodang bilemdangdir, tang asenok timtemba ya asenoki inyakba nungi tagitsü langkabo adoka asenok nungdak peritsü asoshi bilema masü saka tajanzük magütsüba aser techanu memuputsüba mapatem nungang asenok akaba dak alia apusema endokba agi timatemer asütsü. Ashi, asenok ama sensak tia nung alirtem yabo, tangari teyari agütsüba sen agi ki mashi ka nung lia alu ayim nungbo sentsü tsüloksü melen takar kümla. Aji oda, sen apua office ki tulu asütsü melena gari lenmang tajung yanglutsü asübo aser yimtak yimtsüng nung dang masü saka alu nunga dena light tashi angutsüsa electricity bener arutsü asübo sentsü masü saka tagitsüang anüngla. Kasaji, yimtak yimtsüng nunga Panchayat hall aser yim süngküm yanglutsü melena kasa sen amshia alu yimdaktsü asübo mesüra shiruru metsüdaktsü asübo item kisüjensü mapatemjibo nübertem akaba agi saruteper yanglula. Aji oda, arogo nunga tenla aruba agia meperi temulunger tenla bendena tenla kibo yanglu saka tenla kibo tazüngba akümer ta asütsü melena tamangertemi tenla agütsüba sen agi tanela anir aruba mapa inyaktü, külem lisemertem timtem lendong ajurudang yariteptsü aser külem arogo purtem timtem reprangteta yaritsü ta temang aser tanela nungdaktem agüja anepalura, atangji, item tamangertem jagi mulungtet tenla bendenba agi, tang asenoki sentsü tsüa yangluba ki dang nungibo tajungba yanglutsü aser tenla kidang sarasadem manentsü aser sentep nunga pokmaa adenshir mesenshinütsü. Joko, asenok tejangraba ya kisüjensüba nung masü saka rongsen züsentetba nung aser tanela anir aruba nungang tejangraba jangratsüla. Iba jagi dang kin-a aser arogo-a taküm tajungba lia otettsü.

OLEMSABANG

REV. DR. CLARKI TENZÜKBA AROGO OTSÜ

~ Rev. R. Temsü Imchen

(Yashi adok nungi...)

Tanabuba nung pa den semloka Molung Samari yamai ashi, "Nenok British hungeri onok madak yimsü asür. America hungeri onok dang kotaki aoba lenmang sayur. Iba dak alaka langka tajung lir ma? Alima rangpen nung iba ama tesütep kongka mali." Tasembuba nung Longjang Iminükshi yamai ashi, "Clark sahibi onok dang Tsüngrem ka dang lir ta sayu, aser onoki pai ashibaji agizük. Pai sayuba Tsüngrem dang tuluba lir ma? Melira kechiba onok tamang yimsü melenshitsu? Nenokia iba kasa Tsüngrem dang aser pa osang dang sayur süra onok meyiphshitsu nungdak mali. Azüngzülu junga memetetsür yamaji par asemi jembiba ajanga tanübo parnok dang Baptist Tamang Teküzmüker (Defender of Baptist Faith) ta ajatsü langa parnok nem Tsüngremi ochi aser tongmelang shisatsü agütsüogo. Naga nung kin aika nung tamangba yimsü balala aika lir, saka Ao kin atemabo par tamburtemi Baptist arogo tamang kimung kanga junga shitetba agi Ao kin nung telemsa mali ta idakji angatetdi. Tatalokba otsütem indangji Church Historical prespective tsütsülen nungi khen reprangdangtsü merangdi

1. Documents and Literary Approach: Tatalokba otsütemji tesüiba kumtem nung atalokba asünung itemji shitak asü nonga ta ashitsüji parnoki kechisa inyaka aser zülua toktsü (documents and evidences) dak ajemdaker bushitsüla. Iba atema ABAMi Special Committee mapang balala nung shimteta, parnoki ngutetbatem dak ajemdaker telemtetba agia aruogo. Ao kini ano zülutsü aser azüngtsü memetetba mapang asünung, item documents ajak Aolimai arua inyaker American Baptist missionarytemi Home Board dangi züluba shitttem, report balala agütsüba aser tatalokba otsütem dak ajemdaker ABAMi shimba Committeetemi bushitetba dak ajemdaker Mungdang nung telemtetbatemji agia aruogo. Parnoki America tashi oa records aser documents ajak bushiteta bener arua Mungdang nem agütsüogo. Iba khuret pungdoktsü asoshi parnoki tasüngdangba tongtibang onük asem dak ajemdaker inyak ta angateter:

- Aolima nung mezüngbuba arogoji koba asütsü?
- Yim tasen akümdang Molungkimong nung tenzüka aliba arogoji toktsür ao asü mesüra tamangertemji kar idakji yutsür yim tasen jagi ao?
- Molungkimong nung arogoji medangdangi arua asü maru? Rev. L. Kijungi nguteta aliba documenttem dak ajemdaker telemtetba ka agibaji "Saka arogo koba tenzükgogo iba arogoji maneni idakji liasü ta tejangja zülua mali." Iba indang Dr. Clark-i Baptist Missionary Magazine Vol. 72, 1892 nung ya zülua lir: "February ita Deobar tatembangbuba 1892 nung Dekhaimong yimdak nisung asem bapti. Molung aser Yajang nungi Arogo member shirnok Dekhaimongi transfer bener aru, parnok den nisung asem densemer parnok ajak agi terkai (11) Arogoji tenzükg. Dr. Clarki züluba nungi angatetba agibo arogoji tanaben tenzükgshi amato lir. Iba o kasa 1893 nunga pai "The Naga Mission" ta tenüng agütsür Baptist Missionary Magazine Vol. 73 nung ya shia lir: "Yimtsüng tanga nungi Khristantem iba yimi ao (Dekhaimongi) nisung asem bapti aser Arogo ka aküm" (Nokinketer Mongchen p.49).

2. 1981-1986 ABAM Special Committee Osang: 1986 küm ABAM Special Committee-i bener aruba Mungdangi agizüka ayubaji America lima tashi Committee-pur oa tejen record-tem den medemdanga bushiteper küm trok tashi iba Special Committee ajanga ajaklen shisadanga bushir bener aruba ABAM Central Council nung agizüka ayubaji odangbo masü ta tanü Ao Baptist Aogotemi angatetsüla. Iba Special Committee yagi 1980 nung Research Committee kati tengutetba agütsüba dang masü, saka ABAM otsü ajak tiptema ayutsü atema parnoki küm trok tashi kinük ajaklen shisadanger parnoki ABAM asoshi ya tajungtiba asütsü ta parnoki osangji agütsü, aser Inti Mungdang nung parnoki bener aruba ajak kecha memelenshii agizüka ayubaji odangbo masü.

Yim tasen akümdang Molungkimong nung tenzüka aliba arogoji toktsür ao asü mesüra tamangertemji lemdanger senshi asü masü. Ibai 1980 ABAM mendenbubai shimba Research Committee kati tamanger par asembo yim tasen jagi mai ta bushitetba dak ajemdaker 1980 Committee jagi Molungkimong nung tamangertemji medangdangi aru ta kuli agütsü. Saka ABAM? 1981 küm shimba Special Committee 1986 Committee ajanga par asemji yim tasen akümdang ai, aser 1892 Molungkimong nung nisung asem baptiba mapang nungji Molungyimsen aser Yajang nungi züngsem transferred asü ta bener aruba ABAMi agizüka yuogo.

Anungji tangbo arogoji medangdangi aru ta 1980 Committee-i bener arubaji 1986 lemtet jagi kuli makai kümdaktsüogo ta angateter. Kechiaser ibai kasa onük dak aketba nungi kuli jagi mesayur. Angajemtsü asoshi 1872 December 22 Molungkimong yimdak asen lima nung arogo tenzükg. Saka kodang Dr. Clark-i anir Molungyimsen October 24, 1876 nung yim tasen aküm, indangji Molungkimong nung arogo ka toktsüba tejangja mangur, aser iba arogo 1892 nung tanaben tasen kuma tenzükg, saka ajia 1896 nung loksa aser Molungkimong arogo yabo 1919 nung tenzükbaji ang medangdangi aruba arogoji lir. Ibai ajaki meteta aliba otsü asünung, iba indangji kecha rasaa mezüluli.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Red Letter Christians movement tenzüksang Tony Campolo süogo



Tony Campolo
1935-2024

November 20, 2024: Pastor aser nungtugu Laishir, Tony Campolo November 19, 2024 nü alima nungi pilaogo; pa arrshi küm 89 liasü.

Philadelphia nungi Tiny Campolo ya Red Letter Christians movement tentetsang lir; Yisu Khrista tesayubatem nung ajemdaker loktiliba nung temelenshi adokdatsütsü atema pai inyaka aruogo.

Pa indang Facebook page nung sangdong ka ajanga, “Bryn Mawr, Pennsylvania nung par kidang par kinüngertem lia pa süngjema amouzüka ogo,” ta metetdaksü.

Kasa sangdong ajanga, “Pa taküm ya tamang, temeim aser tesendaktep yangludaksüba tashi indang kuli lir. Pai inyakba mapatemji putu aika metettsü,”

ta metetdaksü.

Pa dak sayutsüngitsü aser asayamenütsü sempet tajung liasü. Colleges, Arogotem aser lokti senden aika nung o jembitsü atema pa jaoka liasü.

Pa mezüing University of Pennsylvania nung Sociology tesayur inyak aser Eastern University nung küm aika Professor inyaka liasü.

1990s mapang nung pa taoba mapang US Tir, Bill Clinton atema Spiritual Adviser inyaka liasü. Tamalen pai Evangelical Association for Promotion of Education tenteta liasü. Iba Association ajanga 1970s nungi 2014 küm tashi nung Haiti densema linük aika nung shisaliok jenjang ajungkettsütsü atema inyakogo.

2007 küm Campolo aser Shane Claiborne nati Red Letter Christians tenteta liasü.

Iba nungja ya Laishiba nung Yisu Khristai jembiba otem sentsü temeren nung ajenba, Yisu-i loktiliba aser tangatetba balala indang tesayubatem nung rangloker iba nungja agi.

Shane Claiborne-i social media ajanga, “Tanü ozü tembar tajung ka aser adianu ka makai kümogo. Tony Campolo ya küm 20 dak tali Red Letter Christians ministry nung külem tenzükler ka liasü. Ni pa kanga menungratsü, ajisüaka tzüküm külen adener (kodak nung) pa atema benjungtepdar, ta ni meteta lir,” ta ashi.

Osangbener den jembidang pastor, Ash Barker-i, “Campolo dak otsü ashitsü aser nisungtem ajungmesotsü atema sempet balaka liasü. Pa kanga telongso liasü saka pa dak ajemaluba tanela-a liasü,” ta metetdaksü.

Barker-isa, “Campolo dak nungi angazüktsü tongtibangtibaji kechi liasü? Bendanga agütsüba taküm. Ajak azüoktsü temerang. Yisu nem bendanga agüjang aser nü taküm nung temelenshi tulu atema Tsüngrem tanela nem anidakjang,” ta metetdaksü.

Campolo-i pa kinüngtsü Peggy den chirnur ana aser semchir aika toktsür pilaogo.

Tony nungtem nung memorial sentong ka sangküm küm tetenzüklen Eastern University, Philadelphia nung ayongzüka agitsü.

ANOGO ABEN TSÜNGREM DEN

Tasü itda meshi

Yabez-i Israel Tsüngrem dang jaa ashi, “Oh, nai ni maoajang aser kü littsü ulushidakjangma, aser ne ket kü den liangma, aser ni mejashitsüsa nai ni timtem nungi sotangma!” Aser pai kechi asüngdang Tsüngremi mela. 1 Putipuyang 4:10.

Temulung ajak agi bendanga agütsür tasü itda sarasademba nung Tsüngrem mulung achir aser pai moatsür. Yabez-i Tsüngrem dang temoatsü, tawabangba aser tekümzükba meshia sarasadem aser Tsüngremi moatsü.

Tsüngrem dang meshitsüji Lai O-i sayur. Amanga meshiba ajanga Tsüngrem nungi telangzüba angur.

Yabezi metet, memeshi nungbo mangutsü anungji pai temoatsü meshi. Yabez ama marendaki meshitsü nungdaker. Pai littsü ulushitsü asoshi sarasadem, kechiyong littsü sadema alidak kiset shiruru chiyimdak peria angur. Tsüngrem teka adentsü asoshi sarasadem kechiyong yangji tekümzükba lir. Timtem nungi kümzüktsü asüngdang kechiyong timtem ajanga Tsüngrem nungi melamela atsünga aor. Yabezi Tsüngrem dang kechisa asüngdang ajak Tsüngremi moatsü aser pa azükaru.

Meshiang, aser aji nenok nem agütsütsü, bushiang aser nenoki angutsü, akoshiang, aser aji nenok nem lapoktsütsü. Mathi 7:7.

SARASADEM

Temoatsüba Tsüngrem, ne dang marendaki amanga meshitsü yariangma. Amen

Mexico nung lisopur Khristantemi timtem ajurutsü: Open Doors

November 20, 2024: Mexico nung lisopurtem temeden atema ozüing tasen ka benokogo, ajisüaka Khristan melungtet telok katibo, ozüing tasenbaji ajanga akhi sobaliba aika ozüing ama benoktsü aser ibaji ajanga Khristantem reshikangshitsüa akok, ta metetdaksü.

Khristan melungtet telok Open Doors-i alima tesem balala nung reshikangshi ajangshiba Khristantem nungita yarir.

Open Doors-i, Mexico nung September ita nung agizükba ozüing tasenba nung ajemdaker Khristantemibo akhi külemküja aser sobaliba bejungtem nung shilem agitsü memelungtsü, aser ibaji ajanga Khristantemi reshikangshi ajangshitsüa akok, ta metetdaksü.

Akhi sobaliba külemküja aser benjung nung shiruru tenla agütsüba densema lir, ajisüaka Khristantemibo itemji benshitsü memelungtsü.

“Lisopur telok balala aser yimsü tsütsü sobalibaji taküm libaliro nungi mepilateter,” ta Mexico nung inyaker Open Doors partner, Liz Cortés-i metetdaksü.

“Item külemküja nung Khristan shirnoki shilem magilir itemjibo bendangertem ama züngshir aser loktiliba nung tensa raksatsürtem ama züngshir. Tang ozüing tasen yanglushiba ajanga item akhi sobalibatemi temzüing kümogo, ta shia ketdangsertemi Khristantem amokmerentsü mesüra anema inyaksü,” ta Liz-i metetdaksü.

Mexico tesem aika nung pre-Hispanic yimsütem aser Catholic sobalibaji lisopurtem ajak teinyaksü mapa ama züngshir, saka iba nungji shilem agitsü memelunger aser tenla agütsütsü memelunger Khristantemibo timtem ajurutsü.

Iba ozüing tasenba m e b e n o k d a n g y o n g i Khristantem dang senchi achiba den jail nung puok tenzükogo aser karbo lokti nungi sendokogo.

“Khristantem nem tzü aser electricity ama magütsür aser tanurtem nem shisaliok aser health services magütsür. Ano tatalokba kar nungbo lisopurtem aliba tesemi pastor tem arutsü khenyongi memelar,” ta Liz-isa

metetdaksü.

Khristantem loktiliba nungi sendokba dang masü saka school nunga Khristan tanurtem anema inyaker aser ketdangsertemi tesayurtem dang Khristan tanurtem sendoktsü tuyur, ta Liz-isa metetdaksü.

Meimchir temeden atema inyakerteri ashiba agi, Mexico nung ozüing tasen yanglushiba ajanga Khristantem reshikangshitsü atema ketdangsertem temelung uludaksütsü aser Khristantemi yimsü temeden kecha mangutsü.

Open Doors nungi researcher, Jorge Jiménez-i, “Linük temzüing kübok Khristantemi pei temeden atema ola madoktettsü. Lisopur court temi Khristantem anema inyaksü aser Khristantem anema obendang agütsütsü,” ta metetdaksü.

Liz Cortés-i, “Khristantem anema inyakba mapang nung onoki repranga dangbo metoktsütettsü. Mexico sorkari lisopurtem nem tashi agütsüba denji külemi yimsü temeden-a kümzüka ayutsüji kanga tongtibang,” ta metetdaksü.

Khristan melungtet telok kar indang FCRA license nokdangogo

November 20, 2024: 2014 osang Centre sorkar nem küm nungi tenzüka India nung sorkari Khristan organization aika mita repranger; organization kari bendanglen nungi anguba senotsü tim mesüi amshir ta tai tongloksür aser organization kari tamangba yimsü meyipdaksütsü atema item senotsü amshir ta tai tongloksür, ta International Christian Concern (ICC)-i metetdaksü.

Tawa sorkari, item ama organization aikati ozüing alema tamangba yimsü meyipdaksüba maparen inyaker, ta metetdaksü.

Ministry of Home Affairs-i, ozüing alema yimsü meyipdaksüba maparen balala inyakba ajanga India nung melungtet telok (non-governmental organizations) kar indang foreign funding nokdangogo, ta metetdaksü.

Bendanglen nungi senotsü anguba organizations ket nung Foreign Contribution Regulation Act (FCRA) license alitsü nungdaker. Item organizations-i küm shia audit

osang Centre sorkar nem metetdaksütsüsa akümer.

Osang angazükba agi, melungtet telok aikati, kechiba parnok indang FCRA license nokdang, ta sorkar dang asüngdanga liasü.

Khristan melungtet telok aser civil society melungtet telok aikati foreign funding ozüing alema inyakba ajanga FCRA license agentsüogo, ta ketdangsertemi metetdaksü.

Taküm küm tetenzüklen Home Ministry-i think-tank Centre for Policy Research (CPR), Church of North India-Synodical Board of Social Service (CNI-SBSS), Voluntary Health Association of India (VHAI), Indo-Global Social Service Society (IGSSS), Church Auxiliary for Social Action (CASA) aser Evangelical Fellowship of India (EFI) indang FCRA license agenja liasü.

Home Ministry kübok FCRA unit-i India nung yimsü meyipdaksüba nokdangtsü atema melungtet teloktem atema ozüing tesashi aika benokogo.

AO OSHI ANGAZÜKDAK:

TANÜ ANGAZÜKTSÜBA OJANG



Tashi

(adj) lanu masü tain (matured)

* Süngjang tashi kümerang ongzüktsüla.

Tashi

(adj) kümkümdaktsüba (energy)

* Samson tashi tait nisung ka liasü.

OLONG PAITEP # 6988

Grid for crossword puzzle #6988 with numbers 1-19.

TIPIEN

- 2. Teburtemi tejak nung awaba - (8)
6. T _ _ _ em - (3)
8. Tzüik ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaktüsü nübo - (4)
4. Azüintsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüingda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6987 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü, 5. Lenti, 7. Tajangzük, 11. Teronem, 12. Sempa, 13. Jahaz.

NAI-A YA METETTER MA



Argentina nung asayar Lionel Messi-i ano record tasen ka yangluogo. Peru den FIFA World Cup South America qualifier asayadang Messi-i Lautaro Martinez nem match-winning assist ka agütsü. Iba ya international football nung Messi indang 58 buba assist liasü aser iba ajanga Messi-i United States men's national team legend Landon Donovan den jenjang kasa kümogo.

US embassy ktdangsürtemi BTC tanishir Boro den ajurutep



Guwahati, November 20, 2024 (Agencies): New Delhi nungi US Embassy teshimtet telok kati Mongulbarnü Bodoland Territorial Council (BTC) tanishir Pramod Boro den ajurutepogo.

US Embassy ktdangsürtemi anogo ananü atema Bodoland Territorial Region (BTR) semdangi arua lir aser tanü Kokrajhar nung parnoki Boro den ajurutep.

Minister-Counsellor for Political Affairs Graham

Mayer-i aniba telok nung Senior Political Advisor A Suresh, Political Officer Dan Robbins aser Political Consultant Tinku Roy nung dena lir, ta Kokrajhar District Information and Public Relations Office (DIPRO)-i ashi.

Senden nung health aser education amala tongtipang wadangtem atema olemtep aser BTR renlokba nung yariteptsü jembitep.

Ketdangsürtemi semdangba ajanga United States aser BTR

tesentaktep akangshitsü aser socio-economic development ajungkettsü ta DIPRO-i ashi.

"Graham Mayer aser par telok BTR nung pelashishia agizüker. Parnoki BTR renloktsü aser tejakleni aotsü atema tebilemba aika lir" ta Boro-i metetdaksü.

US ketdangsürtemi mini spun mill aser Bodoland Silk Park Adabari semdang aser telok balala den sendentem amen.

BJP masü saka Biren-i aniba sorkar den pila: Conrad Sangma

Guwahati, November 20, 2024 (Agencies): NPP-i Manipur nung BJP den masü saka N Biren Singh-i aniba sorkar den tesentaktep pila ta Meghalaya Chief Minister aser NPP president Conrad Sangma-i ashi.

"Onoki BJP mesüra National Democratic Alliance (NDA) den masü saka Manipur Chief Minister N Biren Singh pusemba agien" ta Conrad-i

jangjashitsüogo. Manipur nung tensa tamajungba akümba aser nübertem timtemba ngua NPP-i Biren Singh dak tamang makar ta Conrad-i ashi.

2017 nungi NPP-i Manipur nung BJP-i aniba sorkar pusema arur aser 2022 Assembly elections nung züingsem 60 agi akümba assembly nung NPP-i menden 7 nung takok nguteta liasü.

Ajisüaka NPP-i teyari

agianba ajanga Biren Singh sorkar mekongshir kechiyong Manipur Assembly nung BJP-i majority nguteta lir.

Conrad-i central BJP leaders dang mapa kar inyaktüsü ashi saka temulung melemtep adokba ajanga item mapa meinyaktet ta ashi.

Lenisüba melenra NPP-i Manipur sorkar maneni yaritsü asoshi bilemdangtsü ta Conrad-isa ashi.

Jorhat nung yimdong azü telok kati nisung ka ngoset

Guwahati, November 20, 2024 (Agencies): Assam kübok Jorhat nung Mongulbar aonung yimdong nung aliba azü telok kati nisung ka dak angoba sülen asü.

Iba nisung ya Islamuddin Laksar ta jangjaogo. Jorhat kübok Gohain Tekela area

anasa kibur maliba azü telok kati pa amak.

Azü teloki amakba sülen tasüingnep iba temeket nung alirtemi Laksar süchia orr lia angu aser parnoki pa mozü ki dangi anir ao.

Mozü kidang on-duty doctors-i pa anepalu saka

Bodbar aonung pa asü.

Yimdong azü dak rabies keta liasü südi aser iba jagi azütemi nisung amak ta temulung melemi bilemer.

Tesüiba ita ishika tsüingda yimdong zü aika kümogo ta iba tesem nung alirtemi ashir.

Advertisement for Contractual Engagement for Nagaland Forest Management Project. Includes details about the Project Management Unit, positions available (Community Mobilization Expert, Jhum Ecologist, Accounts Assistant, Multi-Tasking Staff, Driver), and application information.

TENÜNGSANG AGÜTSÜR

Chuto Lengri Ao Union Karbi Anglong Assam ajanga **Dr. Temsutola** (Khar) D/o Wb. Tongpang Walling (Khar) aser Wt. Selemi Jishing, PhD jenjang "Ethno Botanical study of the Rengma Naga Tribe of Karbi Anglong District in Assam India" St. Joseph University Chümoukedima, Department of Botany nungi anguba tepela lemsateper. Asen Teyanglur Tsüngremi nü wadang ano temabai ajungketangma.

Sd/-
Bendangyanger
Gen. Secy., CLAU

Sd/-
Imlichuba
President, CLAU

AO KAKETSHIR TELONGJEM
KOHIMA SCIENCE COLLEGE, JOTSOMA

INVITATION 1974-2024

AO KAKETSHIR TELONGJEM, KOHIMA SCIENCE COLLEGE,
JOTSOMA ASER HON JUBILEE PLANNING COMMITTEE AJANGA
TAMASA TSÜNGREM TEHEIM SALEM LEMSATEBER.

ASENOKI YONGYA ALIBA HON JUBILEE BENJONGMUNG NUNG
ATENTSÜ ASEN AOR ASER AOTSÜR KOHIMA SCIENCE
COLLEGE, JOTSOMA, ALUMNITEM AJAK PELASHISHIA JAOKER.
NA ASER NER KIBONG ARUA ATENBA AJANGA JUBILEE BENJONG
TALI MERA KETA AMONGTSÜ YIMLAA ATAR.

TONGTI TESEM DANGER:
WB. METSÜBO JAMIR
MINISTER
RURAL DEVELOPMENT &
SIRD
GOVT. OF NAGALAND

JUBILEE O JEMBIR:
WB. SUPONGNUKSHI
IFS, CHIEF CONSERVATOR
OF FOREST

Anogo: 23th November, 2024
Mapang: 10:00 AM
Tesentepdak: Auditorium, KSCJ

Khyber-Pakhtunkhwa nung Pak nunger sepai 12 tepset

Islamabad, Yimpoksüi/November 20 (Agencies): Khyber Pakhtunkhwa province kübok Malikhel tesem nung suicide bomber kati gari ka nung bomb inoka bener oa joint checkpoint ka dak tsüka bomb pokdaksüba nung Pakistan Army 12 asü.

Pakistan Army indang media wing Inter Services Public Relations (ISPR)-i ashiba agi, "Mongolbar aonung Bannu district kübok MaliKhel tesem nung kiralongrartemi joint check post ka amaktsü meranga liasü, saka parnoki post telungi aitsü merangba sepaitemi nokdanga liasü."

"Bomb pokdaksüba sülen atsü shilem ka chirep aser atsü den atonga aliba kiojentem raksaba sülen security forces

nungi sepai 10 aser Frontier Constabulary nungi sepai ana densema sepai 12 taküm samaogo," ta ISPR-isa metetdaksü.

Pakistan Army-isa, kiralongrar trok khasetba osang metetdaksüogo. PTI sangdong ajanga ashiba agi, lendong nung yirurtem local mozüki kati temang anepalutsü atema anirogo.

Pakistani Taliban nungi jakzüka aoba Hafiz Gul Bahadur teloki iba tesem amakba nangzükogo, ta AP-i metetdaksü.

"Iba tesem maneni meita odar aser aibelena alirtem nem tapet temerenshi agütsütsü," ta kasa sangdong ajanga metetdaksü.

Pakistan kübok Balochistan

asir Khyber Pakhtunkhwa province nung kiralongrar dak sendakba tatalokbatem tali küma odar.

Iba ita tetenzüklen Quetta kübok railway station ka nung bomb pokdaksüba sülen Pakistan Army 14 densema nisung 25 asü. Balochistan yimtiba nung nüburtem train ka atatepa aliba mapang iba bomb pokdakja liasü.

Centre for Research and Security Studies (CRSS)-i ashiba agi, Pakistan nung 2024 küm tatemlen azütokshi lendong taliba kümogo.

Bodhbarnü Pakistan Ato Kilonser Shehbaz Sharif-i, Balochistan province nung linük anema nokdakertem anema military jenjang tasen ka agitsüba sangdongogo.

Uganda nunger opposition lenir ka Kenya nung apu

Kampala, Yimpoksüi/November 20 (Agencies): Uganda nung nungtuugu opposition lenir Kizza Besigye, kidanger Kenya nung pur (kidnapped) Uganda nung military tepuokdak kati anirogo, ta pa kinungtsü metetdaksü.

HIV/AIDS (UNAIDS) dak sendakba nung United Nations programme executive director

Winnie Byanyima-i Uganda sorkar dang X nung post ka ajanga la kinungbo tangsa tang chioktsü takhangba ka agütsüogo.

Pa Kenya yimtiba Nairobi nung tanga yimden yimsüstir ka indang kaket sayaba sentong ka nung adeni aoba mapang taoba Honibarnü apu, ta Byanyima-i ashi. "Pa Kampala nung military tepuokdak ka nung yua lir ta ni

osang tejangja angazükogo," ta lai zülutsü. "Onok aser pa okatsüri pa den ajuruteptsü akhanger. Pa sepai ka masü. Pa kechiba military tepuokdak ayur?" ta laisa zülüja liasü.

Iba tatalokba dak sendakba nung Uganda sorkar aser military napronglai telangzüba kecha magütsü.

(Maneni tapak 8 nung...)

Form No. 3
[See Regulation-15 (1)(a)] / 16(3)

DEBTS RECOVERY TRIBUNAL GUWAHATI
Suwarna Bhawan, House No.12,
New Town Path, Near Hanuman Mandir,
G.S. Road, Ulubari,
Guwahati - 781007 (Assam)

Case No.: OA/313/2024
Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.
Exh. No.: 4468

HDFC BANK VS MR N LANGPHONG

To,
(1) MR N LANGPHONG
S/O NYEIBA HOUSE NO 128 CHANGKANG
KHEL VILL MONYAKSHU P.O TOBU
NEAR KONYAK BAPTIST CHURCH MON
DIMAPUR NAGALAND - 798603
ALSO AT
HOUSE NO 319 GROUND FLOOR BLOCK
NO VI SIX WARD NO 13 LOWER NEAR
TAXI STAND CHANDMARI KOHIMA
NAGALAND - 797001

JAOKER
OA/313/2024 ya Hon'ble Presiding Officer/Registrar matsüngdang 30/10/2024 nung zülüoka liasü. Sentsüh sen 22,72,818.49/- (application den documents balala copy tem inoka lir) menoktsü atema Act, (OA) indang section 19(4) kübok iba Application atema Hon'ble Tribunal ajanga summons/notice agütsür.
Act indang section 19 indang sub-section (4) nung aliba ama na defendants asünung item totuyuba ya agütsür:-
(i) Iba osang sangdonger anogo 30 tsüngta parnoki asüngdanga aliba ama kechiba meinyaktsüla ta asüba kuli agütsütsüla; (ii) original application indang serial number 3A kübok applicant-i tejangja shia aliba ki o jen aser rongsen dak alaka danga ki o jen aser rongsen tejangja shitetsüla; (iii) ken o metembang tashi original application indang serial number 3A kübok shia aliba secured assets mesüra iba ama danga rongsen aser ki o jen mayoktsüla aser dangar nem magütsütsüla; (iv) Tribunal nungi temelaba magie original application indang serial 3A kübok shia aliba rongsen tem mayoktsü, dangar nem khen atema mamshidaksütsü; (v) ordinary course of business nung secured assets mesüra danga assets aser ki o jen tem ayokba nungi aruba sen tem item rongsen mechi security interest aliba bank mesüra financial institutions temi amshiba account nung inoktsüla.
Na tezüluba nung statement agütsütsü aser Registrar matsüngdang 05/12/2024 anepdang 10:30 ako nung arua nokdaksü totuyuba agütsür aser yamaji meinyakra na meliaka ken o jembitsü aser telemetba agütsü. Iba 11/11/ 2024 anogo iba Tribunal tenüng nung ni meyonngem aser seal agütsür.

Sd/- Registrar
Debts Recovery Tribunal
GUWAHATI.

Gaza nung pua alir chioktsü mechi PM Netanyahu-i sen \$5m agütsütsü

Tel Aviv, Yimpoksüi/Nov. 20 (Agencies): Israel Ato Kilonser Benjamin-i Gaza nung pua alir chiokba shia sen \$5 million agütsütsü aser Hamas-i pua aliba Israel nunger chiokba nung yariritem rara agi raksar aliba Palestinian territory nungi adoktsü lenmang ka agütsütsü ta ashi.

Netanyahu-i iba sempet ya Mongulbarnü Gaza semdangba mapang sangdong, kong pa dang Israel mitkar indang Netzarim Corridor sayua liasü, koba tongtipang lenmang aser buffer zone ka Israel army temi southern Gaza nungi northern Gaza sadangtsü yangluba lir.

"Iba tebenja nungi ainshiner dang ni ya ashir: Shibai pua alir ka onok dangi anur arutsüdir, pa aser par kibong asoshi timtem maliba lenmang agütsütsü. Pua alir shia atema onoki sen \$5 million agütsütsü," ta Netanyahu-i mapang tatsüka Palestinian territory semdangba mapang ashi.

"Koba inyaktsü, aji nenok melung, saka result kasa asütsü: Onoki parnok ajak anir arutsü," ta pai ashi.

Gaza nung tang tashi nisung 101 pua lir ta Israel-i asadanteta lir, ajisüaka parnok asemsü kumer shilem ka süogo ta amanger.

Pua aliba kinunger aser parnok bhukumer temi Israel nung maneni longkak aitba mapang Netanyahu-i iba sempet indang sangdonga liasü.



Israel nung nisung aikati parnok kinungertem den ajuruteptetsüsa Hamas den ceasefire yangluang ta ato kilonser dang akhanger.

Netanyahu-i pua alir ajunga chioktsü atema mitkar inyakyim ya dang lenmang lir ta shijen shia arur aser nükjidong matong tashi Israel-i Gaza nung maneni raratsü ta ashir.

Pua aliba kinunger temi ceasefire alitsü atema Netanyahu sorkari mera abensa magir ta aitsür aser foreign media dang miim inyakyim temai adokdaksü ta temulung melema taoba mapang Netanyahu den yariteper ka puogo.

Gaza nung rara tembangtsü aliba Netanyahu-i raksatsü ta analysts temi ashir, kechiaser rara ya tatem kati arura par far-right aser ultranationalist sorkar ya laotsü aser October 7 nü Hamas-i amakba nung security tsütsü tamakok ajuruba atema Netanyahu aser Israel

committee kati taoba hopta, Israel indang tasa yagi kin ajunga samatsütsü merangba mesüka ajiteter, ta shia liasü aser iba territory nung Palestine nunger civilian anema yasa-tzüraba ya rara yimya ka ama amshir ta aitsü.

Israel-i civilian aika takum samatsüoho aser Palestine nunger takum lendongi aitsüsa tensa bener aruja lir, ta committee yagi shia liasü.

"Rara tenzükba sülen Israel ketdangtsür temi yimjak nung Palestine nunger takum alitsü asoshi nungdakba - chiyongtsü, tzü aser totzü soita ayuba sentongtem yarir."

Israel-i Gaza Strip nung raradang Palestine nunger 44,000 jungnüa tepsetogo aser 104,000 dak tema yiruja lir.

Alima nung rongsenketzüng tsütsü tashi tulu aliba linük 20 (G20) lenirtem Rio de Janeiro nung Hombarnü senden amendang Gaza nung ajak asoshi ceasefire alitsü ayongzüka liasü.

Sangdong ka nung lenirtemi Gaza nung nisung meimchir tensa mejungi aliba indang tebilemstü khuret lemsatep aser ano Lebanon nunga tensa tamajungba akumba indang lematepa liasü.

Southern Lebanon aser northern Israel nung nüburtem pei kidangi tetsübo makai meyipa shilangtsü asoshi ceasefire alitsüla, ta G20 lenirtemi ashi.

XLbuba Nagaland Police Duty cum sport meet tembangogo



Dimapur, Yimpoksüi/ November 20 (TYO): XLbuba Nagaland Police Duty cum sport meet shibangba sentong November 20 nü NAPTC Grounds, Chumoukedima nung agiogo. Asayamung shibangba sentong nung Nagaland Legislative Assembly Speaker Sharingain Longkumer alakteta jaoker liasü.

Iba sentong ya Drill tetoktepba Finals agia tenzük, koba 12th NAP (IR)-i akok aser 15th Mahila NAP (IR) tanabuba

aser 5th NAP tasembuba nung liasü. Sentong nung Director General of Police Nagaland Rupin Sharma, IPS-i lokti pela agizükba o jembia aser pai alakteta jaoker dang iba sentong maotsüba atema kanga pelaba lemsatepa liasü. Pai NPM ya 1967 küm nungi asaya arur aser asayar tajungtem jangjatsü atema sabang tajung ka lir ta ashi. Iba amala asayamung ka ayongzüka asayatsü atema senotsü aika nungdaker aser taküm NPM atema Nagaland

Chief Minister-i sen lakh 50 agütsüba atema kanga pelaba lemsatepa liasü. Maneni corporate sponsors ajanga Bank of Baroda-i sen lakh 10 aser Indian Oil Corporation-i sen lakh 10 agüja liasü.

Paisa, taküm mezüngbuba NPM nung police personnel tem rongnung certified referee temi Football aser Boxing asaya achaayanga liasü, ta ashi. Asayamung tepeyong nung asayartem yiruyipong tulu majangshiba ajanga Nagaland Police nungi asayartem temang

anema aliba sayur, ta paisa shisem.

Sentong nungsa Asst Organizing Secretary Ben Longkumer, NPS-i asayamung indang osang agüja liasü.

Kasa mapang nung alakteta jaoker Sharingain Longkumer-i, NPM ya Police calendar nung tongtibang sentong ka lir, koba küm ana nung khen asayar ta ashi. Iba asayamung ya sentong ka dang masü saka Nagaland Police tashi aser tanüla indang kuli lir. Nagaland Police ya state sorkar asoshi tashi tait teka ka ama lir. Police temi state nung temzüng ozüng azüokba den, ozüng alema inyaksangshirtem nokdang aser state nung aliba nüburtem tekümzüka kübok toktsür, ta pai ashi.

Paisa, Chhattisgarh aser West Bengal aser tanga tesemtem nung naxal anema raraba mapang Naga nungertem taküm bendanga agütsüba

indang jembia liasü. Pai, police inyakyim ya kanga kara melenshia aoba inyakyim ka lir aser technology melenshia den külemi melenshia aotsü nungdaker ta ashi.

Maneni pai, temesepba mozü anema rarba nung Police Department tejakdang sür jenjang tapet agiba atema parnok nem tenütsang agütsü. Paisa, iba asayamung takok ngua ayongzüka asayaba atema asayamung ayongzüka asayaba committee nem tenütsang agüja liasü.

Maneni sentong nung games discipline aser duty items atema takok marok aser medal team lemja liasü.

6th NAP Bn-i Overall 'Games' Championship angu aser 12th NAP (IR) Bn-i Overall 'Duty' Championship ngua liasü. Best Discipline Team 12th NAP (IR) Bn liasü aser asayamung Overall Champion 12th NAP (IR) Bn liasü.

6buba Dimapur District Inter-Departmental Sports meet tenzükogo

Dimapur, Yimpoksüi/ November 20 (TYO): 6buba Dimapur District Inter-Departmental Sports meet, November 20 nü Multi-Disciplinary State Stadium, ADC Court, Dimapur nung tenzükogo.

Asayamung lapokba sentong nung 43 Assam Rifles Commandant Col. Ullas Badoni tetushi tejaoker liasü.

Sentong nung o jembiba mapang Col. Ullas Badoni-i, departmental team tem asayamung nung shilem agitsü atema jangrabangra sentepba atema tenütsang agüja liasü. Paisa, employee temi bendanga agütsüba sayuba aser asayamung ayongertemi mapa aser asaya na liromedema ajungketba atema tenütsang agüja liasü.

Col. Badoni-i ashiba agi,

team tanüla aser nisung ka tekelok shisatsü jenjang ajungkettsü atema saisapong yagi tongtibang shilem agir, ta ashi. Paisa, iba amala asayamung ajanga shi temang nung tajangzük agütsüba dang masü saka sütöksünemtsü atema maongka agütsür aser iba ajanga mapa nunga takok tali angur ta ashi.

Kasa mapang nung Dimapur Deputy Commissioner Dr. Tinojongshi Chang-i, asayamung nung shilem agirtem pelashishia agizük, aser department balala yongtsü nung tesendaktep akangshitsü atema employee tem longjemdaksütsü koda tongtibang iba indang lemsatepa liasü.

Paisa, asayamung ajanga sensaksemtsü aser teamwork atema sabang tajung agütsür,

koba office mapangbo aiben mangur ta ashi. Chang-isa, November 22 nü merkemjung sentong ka ayongzüker aliba indang metetdaksü aser department tem dang iba sentong nung shilem tajung agitsü ajungshia liasü.

Iba asayamung nung tetsür aser tebur naprongla table tennis, football penalty shootouts, tug of war, badminton aser carom board amala asaya balala asayatsü.

Iba asayamung ya November 22 nü tembangtsü. Anogo asem asayatsü aliba asayamung ya sorkar tenzükertem yongtsü nung tesendaktep tajungba kümdaksütsü aser asayamung nung shilem agirtem shi temang nunga tajangzük kadaksütsü nükjidong nung ayongzükogo.

NWA-i ayongzüka Referee clinic ka agiogo



NWRB züngsemtem den NWA ketdangsurtem practical session metenzük tsüngda tangokba noksa nung angur.

Kohima, Yimpoksüi/ November 20 (TYO): Nagaland Wrestling Association (NWA)-i ayongzüka Nagaland Wrestling Referee Board (NWRB) nung züngoksema aliba züngsemtem atema anogo ka asoshi referee clinic ka ayongzüka agiogo. Iba clinic ya Bodhbarnü Indra Gandhi

Stadium (IGS) Multipurpose Hall "A" nung agia liasü.

NWA Media Cell sangdong ka ajanga ashiba agi, taruba NWA championships; 17buba International Hornbill Naga Wrestling Championship nung benoktsü atema referee tem nem inyakyim tasentem indang tangazükba agütsütsü nükjidong

nung iba clinic ya ayongzüka agiogo.

17buba International Hornbill Naga Wrestling Championship ya December 4 nü Khuochiezhie nung asayatsü lir.

Ajak senteper NWRB züngsem 18 aser NWA ketdangsurtemi iba clinic nung shilem agia liasü.

BENDANGLI OSANG : Tapak 7 nungi...

Uganda nunger opposition lenir...

Besigye ya Bodhbarnü military court ka nung nokdaksü lir ta pa okatsürtem rongnung kati metetdaksüogo. "Besigye ya Kampala nung military tepuokdak ka nung yua lir aser army-i pa tanü General Court Martial nung nokdaksütsü sentong yangludat ta angazükogo," ta Erias Lukwago-i AFP news agency dang ashi.

"Pa kechiba aitsü iba indang tang tashi mejangjai lir," ta paisa shisem,

Uganda police otongdar Kituuma Rusoke-i Reuters news agency dang ashiba agi, pa police ket nung mali aser pa kong ali iba dak sendakba nung kecha osang magütsütettsü.

Kenya indang foreign affairs principal secretary Korir Singoei-i local media dang ashiba agi, iba tatalokba nung Kenya densema mali.

July ita Kenya nunger ketdangsurtemi Besigye indang Forum for Democratic Change (FDC) party züngsem 36 pua liasü. FDC party ya

Uganda nung opposition party tongtibang rongnung ka lir.

Iba sülen parnok Uganda-i yok, kong parnok kiralongraba dak sendakba nung aija liasü.

Kümtem tsüngda Besigye ya aiben puogo. Pa ya mapang ka nungbo Uganda tir Yoweri Museveni indang personal doctor liasü, ajisüaka mapang tatsüka lir sorkar aitsür ka aser yimden yimsüsüba tsütsü opponent ka aküm.

Pai Museveni den pezüben toktep, shibai Uganda 1986 küm nungi yimsüsüa arudar. Tetoktepba shia pai tamakok angu ajisüaka pai result tem magizük aser ashiba agi, election inyakyim nung ochi mashi ken o sendaka lir aser voter tem amokmerena liasü.

Kümtem tsüngda Museveni-i aniba sorkar ya opposition aser parnok pusemertem meimchir temeden anema inyaksangshiba atema aija arudar, kong parnok ozüng alema apuba, rishikangshiba aser tepsetba (extrajudicial) densema lir.

BILEMDANGANG
"O jembizüka meyok tsüngda tamasa kanga junga bilemdangang."